

小兒藥證真訣

卷一

小兒藥證真訣

小兒藥證真訣原序

醫之爲藝誠難矣而治小兒爲尤難自六歲以下黃帝不載其說始有顙顙經以占壽夭死生之候則小兒之病雖黃帝猶難之其難一也脈法雖曰八至爲和平十至爲有病然小兒脈微難見醫爲持脈又多驚啼而不得其審其難二也脈旣難憑必資外證而其骨氣未成形聲未正悲啼喜笑變態不常其難三也問而知之醫之工也而小兒多未能言言亦未足取信其難四也臟腑柔弱易虛易實易寒易熱又所用多犀珠龍麝醫苟難辨何以已疾其難五也種種隱奧其難固多余嘗致

思于此又目見庸醫妄施方藥而救之者十常四五良
可哀也蓋小兒治法散在諸書又多出于近世臆說汗
漫難據求其要妙豈易得哉太醫丞錢乙字仲陽汝上
人其治小兒該括古今又多自得著名于時其法簡易
精審如指諸掌先子治平中登第調須城尉識之余五
六歲時病驚疳癖痕屢至危殆皆仲陽拯之良愈是時
仲陽年高少不肯輕傳其書余家所傳者纔十餘方耳
大觀初余筮仕汝海而仲陽老矣于親舊閒始得說證
數十條後六年又得雜方蓋晚年所得益妙比于京師
復見別本然旋著旋傳皆雜亂初無紀律互有得失因

得參校焉其先後則次之重複則削之訛謬則正之俚語則易之上卷脈證治法中卷記嘗所治病下卷諸方而書以全于是古今治小兒之法不可以加矣余念博愛者仁者之用心幼幼者聖人之遺訓此惠可不廣耶將傳之好事者使幼者免橫夭之苦老者無哭子之悲此余之志也因以明仲陽之術于無窮宣教郎大梁閻季忠序

錢乙傳

錢乙字仲陽上世錢塘人與吳越王有屬俶納土曾祖
贊隨以北因家于鄆父顥善鍼醫然嗜酒喜游一旦匿
姓名東游海上不復返乙時三歲母前亡父同產姑嫁
醫呂氏哀其孤收養爲子稍長讀書從呂君問醫呂將
歿乃告以家世乙號泣請往跡父凡五六返乃得所在
又積數歲乃迎以歸是時乙年三十餘鄉人驚歎感慨
爲泣下多賦詩詠其事後七年父以壽終喪葬如禮其
事呂君猶事父呂君歿無嗣爲之行葬服嫁其孤女歲
時祭享皆與親等乙始以顥顥方著山東元豐中長公

主女有疾召使視之有功奏授翰林醫學賜緋明年皇子儀國公病瘵痠國醫未能治長公主朝因言錢乙起草野有異能立召入進黃土湯而愈神宗皇帝召見褒諭且問黃土所以愈疾狀乙對曰以土勝水木得其平則風自止且諸醫所治垂愈小臣適當其愈天子悅其對擢太醫丞賜紫衣金魚自是戚里貴室逮士庶之家願致之無虛日其論醫諸老宿莫能持難俄以病免哲宗皇帝復召宿直禁中久之復辭疾賜告遂不復起乙本有羸病性簡易嗜酒疾屢攻自以意治之輒愈最後得疾憊甚乃歎曰此所謂周痹也周痹入臟者死吾其

已夫已而曰吾能移之使病在末因自製藥日夜飲之
人莫見其方居亡何左手足攣不能用乃喜曰可矣又
使所親登東山視兔絲所生篝火燭其下火滅處斲之
果得茯苓其大如斗因以法噉之閱月而盡繇此雖偏
廢而氣骨堅悍如無疾者退居里舍杜門不冠履坐臥
一榻上時時閱史記雜說客至酌酒劇談意欲之適則
使二僕夫輿之出沒閭巷人或邀致之不肯往也病者
日造門或扶攜襁褓負纍纍滿前近自鄰井遠或數十
里皆授之藥致謝而去初長公主女病泄痢將殆乙方
醉曰當發疹而愈駙馬都尉以爲不然怒責之不對而

退明日疹果出尉喜以詩謝之廣親宗室子病診之曰
此可無藥而愈顧其幼曰此兒旦夕暴病驚人後三日
過午無恙其家恚曰幼何疾醫貪利動人乃如此明日
果發癰甚急復召乙治之三日愈問何以無疾而知曰
火急直視心與肝俱受邪過午者心與肝所用時當更
也宗室王子病嘔泄醫以藥溫之加喘乙曰病本中熱
脾且傷奈何以剛劑燥之將不得前復洩與石膏湯王
與醫皆不信罷謝乙曰毋庸復召我後二日果來召適
有故不時往王疑且怒使人十數輩趣之至曰固石膏
湯證也竟如言而效有士人病面咳青而其氣哽哽乙

曰肝乘肺此逆候若秋得之可治今春不可治其家所
哀強之與藥明日曰吾藥再瀉肝而不少卻三補肺而
益虛又加脣白法當三日死然安穀者過期不安穀者
不及期今尙能粥居五日而絕有娠婦得疾醫言胎且
墮乙曰娠者五歲傳養率六旬乃更能候其月徧補之
可不墮已而子母皆得全又乳婦因大恐而病病雖愈
目張不得瞑久不能曉以問乙乙曰煮郁李酒飲之使
醉卽愈所以然者目係內連肝膽恐則氣結膽衡不下
惟郁李去結隨酒入膽結去膽下目則能瞑矣如言而
效一日過所善翁聞兒唬愕曰何等兒聲翁曰吾家孿

生二男子也乙曰謹視之過百日乃可保翁不憚居月
餘皆斃乙爲方博達不名一師所治種種皆通非但小
兒醫也于書無不闕他人靳靳守古獨度越縱舍卒與
法合尤邃本草多識物理辨正闕誤人或得異藥或持
疑事問之必爲言出生本末物色名貌退而考之皆中
末年癯瘠浸劇其嗜酒喜寒食皆不肯禁自診知不可
爲召親戚訣別易衣待盡享年八十二終于家所著書
有傷寒論指微五卷嬰孺論百篇一子早世二孫今現
爲醫劉跂曰乙非獨其醫可稱也其篤行似儒其奇節
似俠術盛行而身隱約又類夫有道者數謂余言曩學

六元五運夜宿東平王家嶺觀氣象至逾月不寐今老
且死事誠有不在書者肯以三十日暇從我當相授余
笑謝弗能是後遂不復言嗚呼斯人也如欲復得之難
哉沒後余聞其所治驗尤衆東州人人能言之掇其章
章者著之篇異時史家序方術之士其將有考焉宣和
元年劉跂撰

小兒藥證真訣目錄

卷一

變蒸論

脈法論

驚癇發搐論

五癰論

慢驚論

急慢驚論

心論

肝論

脾胃論

肺論

腎論

別虛實證論

諸疳論

腹中有癖不食論

腹脹論

黃疸論

傷風論

傷風吐瀉論

嘔吐論

初生吐不止論

吐痰涎論

咳嗽論

風溫潮熱相似論

諸汗論

熱渴論

身熱論

積痛論

心痛論

蟲痛論

胎熱論

胎肥論

胎怯論

夜啼論

驚啼論

食乳論

顙顙不合論

龜胸論

龜背論

行遲論

弄舌舒舌論

齒落不生論

目論

傷寒瘡疹同異論

瘡疹候論

瘡疥風癬論

不治證論

卷二

搐別真假

發搐順逆

潮熱問難

吐瀉爭功

吐瀉問難

虛實下藥

寒熱相反

補下不向

癖爲潮熱

虛實熱證

熱不可下

預說驚疾

溫冷用藥

陰癰壞病

治病有等

用藥識證

病誤用巫

病篤訣

嗽痛決死

蟲痛決死

瘡疹標本

瘡疹有誤

熱傳瘡疹

卷三

地黃丸

當歸散

調中丸

塌氣丸

大青膏

敗毒散

玉露散

異功散

荳蔻散

木瓜丸

香銀丸

藿香散

辰砂丸

麻黃湯

生黃膏

木香丸

胡黃連丸

蘭香散

白粉散

如聖丸

膽礬丸

青金丹

止汗散

香瓜丸

黃耆散

虎杖散

郁李仁丸

捻頭散

生犀散

三黃丸

大黃圓

龍腦膏

梔鼓飲子

白虎湯

犀角圓

大黃丸

瀉心湯

導赤散

桃枝圓

白餅子

紫霜丸

珍珠丸

消堅丸

鐵粉丸

麝蟾丸

安蟲散

五色丸

鉤藤飲子

豆卷散

龍腦散

回生散

梓朴散

羌活膏

溫白丸

蘇蘆湯

小惺惺丸

金箔丸

蟬花散

安神丸

天南星散

瀉白散

益黃散

瀉黃散

白朮散

瀉青丸

生犀散